

Date – 17/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizorama raltlan awm mek mi 40,000 velte tanpuina atana a thlawna buhfai sem tur chu phurhluh zawh tep a ni.
2. Sinlung Hills Council inthlanna a member 12 thlan tlinte chu naktuk hian thutiamtira lakluh an ni dawn.
3. A wawi khatna atan wawiin khan African Swine Fever vangin vawk thi report a awm lo.
4. Manipur-a district 5-ah tiamchin awm lovin curfew puan a ni.

<><><>

RICE FOR REFUGEES

Mizorama raltlan awm mek mi 40,000 velte tanpuina atana a thlawna buhfai sem tur chu phurhluh zawh tep a ni.

Food, civil supplies & consumer affairs (FCS&CA) department hotute hnen atanga thu dawn danin sorkar laipui ruahmanna anga buhfai metric tonne 1,379 leh quintal 34 phurh luh hna hi zawh fel a ni tep tawh a. Tun kar chhung hian phurh luh zawh hman beisei a ni. Food corporation of India (FCI)-in pekchhuah phalna (release order) a tihchhuah mai loh avangin buhfai phurh hna hi an tan tlai a. Chuti chung chuan phalna hmuh ve leh atangin phurh luh nghal a ni a. Tun kar hi chuan zawhfel vek tum a ni. Buhfai hi district hmunpui thlenpui a, kudam a dah nghal zel a ni a. FCS&CA director chuan tunkar chhung hi chuan phurh zawh fel vek hman an inrin thu Akashvani Aizawl a hrilh a. Hemi hnu lamah chuan home department ruahmanna-in district 11 a bawrhsap pisa a hnathawkte'n a sem hna an buaipui zui dawn a ni.

Puan tawh thin angin,sorkar laipui Ministry of Home Affairs chuan Mizoram a awm mek raltlante tanpuina atan an ei tur cheng vaibelchhe nga hu a ruahmanin a, hei hi a thlawna sem tur a tih a ni. Supply department hotute chuan cheng vaibelchhe 5 hi buhfai leina, a phurh chhuahna leh a semna senso daih vek tura ngaih a nih thu an sawi a ni.

Hriat theih hnukung berah Mizoramah Myanmar raltlan mi 33,004 an awm a, Bangladesh atanga raltlan ,mi 2,014 an awm bawk a. Manipur a tharum thawhna avanga humhimna zawnga rawn tlan lut hi an kir tam leh tawh hle na-in mi 4,200 chuang vel la awm anga ngaih a ni. Manipur atanga rawn lut hi an tam lai berin mi 12,000 chuang an tling a, Myanmar raltlan pawh hi an tam lai berin mi sing li an chuang a ni.

Myanmar leh Manipur atanga sahimna zawnga lo lutte hi district hrang hrangah an awm darh a. Tam tak chu an puala siam relief camp-ah awmin chhungkhat laina leh thiante rawn bel bakah mi in luah a awm an awm bawk a, Bangladesh raltlante erawh chu Lawngtlai district-ah chauh an awm thung a ni.

<><><>

MSPMC

Kumin January ni 22 a din Mizoram State Project Monitoring Committee (MSPMC) chuan tun hnai thleng khan hnathawh mek 31 zingah hna thawh chhe tak tak engemawzat a hmuchhuak.

MSPMC-in hna hrang hrang a endik tawh 31 zingah hian central sorkar project 22, cheng vaibelchhe 419 leh nuai 7 hu, state sorkar hnuai a thawh project 5, cheng vaibelchhe 65 leh nuai 32 hu bakah hna 4, cheng vaibelchhe 735 leh nuai 81 hu chu central leh state sum hmanga project thawhte a ni a. Hna 31 thawhna atana sum ruahman hi a vai chuan cheng vaibelchhe 1,220 leh nuai 20 a ni. MSPMC-in an endik tawh zinga Project thenkhat, hna tha lo leh a nih tur ang pha lo te chu siam thattir mai bakah Department a endikna a mawhphurtute chung a dan anga action la tura thurawn pek te pawh a awm bawk niin tun hnai a MSPMC hmalakna tlangpui thirletna tihchhuahah tarlan a ni a. Project an tlawh tam zawk hi contractor-te hian a tira zawh hun tur bituk (scheduled completion time) an pel deuh vek hlawn a. Department lam atanga vil hneh tawh loh avang te, Covid hrileng leh hmanrua chawh luhna lama harsatna avang te a ni a. Hun pek belh chhung ngeia hna fel fai taka an zawh theih na'n, Resource Based Work Program rintlak siama zawm nghal turin a vawngtu Department leh Contractor te hriattir an ni thin ani.

MSPMC in project an endik tawh tam ber hi Non-works Department (Project chinchang hrethiam Engineer te awm lohna) te thawh a ni a. Contractor te hnathawh endik kawngah harsatna lian tak awmin, hna quality-in a tuar tlangpui a. Hna thenkhatah chuan a taka hna thawktute hi a hming kengtu contractor ni lovin midang hminga thawk te niin a lang bawk. Hetianga contractor ten an hna, midang kuta an dah hi project hna hian a tawrh phah em em niin an sawi a ni.

<><><>

SHC OATH TAKING

Tun hnai Sinlung Hills Council inthlanna a member 12 thlan tlinte chu naktuk hian thu tiamtira laklul an ni dawn.

Aizawl district bawrsap thuchhuahin a sawi danin Sinlung Hills Council inthlan thlan tlinte hi Aizawl Bawrsap Pisa Pui Hall-ah Thawhtanni chawhma dar 11-ah thutiam tira laklul tura ruahman a ni a. Protam chairman atana thlanin thu hi a tiamtir ang. Thu dawn danin hemi zawhah hian Sinlung Hills Council chairman tur thlan a ni ang a. Chumi zawhah chuan MNF leh a thawhpui HPC ® atanga thlan tlin mi 7-te chuan sorkarna an siam theih thu chairman hnenah hriattirin an nihna tura lo ruahman lawk angin an inrawt zel ang a. Chief Executive Member (CEM) leh Executive Member (EM) te pawh thutiam tira laklul nghal turin ruahmanna an siam niin MNF party hruaitute chuan an sawi a ni.

Tun thla ni 5-a Sinlung Hills Council inthlanna-ah khan MNF-in bial 5 an la a, an thawhpui HPC (Reformed)-in bial 2 la-in sorkarna an siam thei a. ZPM in bial 4 la-in Congress in bial 1 an la a ni.

Thu dawn danin MNF member Vanbawng bial atanga thlan tlin Pu Ricky Lalremsanga chu CEM a ni dawn a. EM turte a ruat leh dawn a ni.

<><><>

CIC

Chief Information Commissioner, Central Information Commission Heeralal Samariya chuan ni hnih cham a Mizoram a tlawh turin, vawiin tlai khan Aizawl a rawn thleng.

Samariya hian naktukah Mizoram Information Commission official te nen inkhawm pawimawh an nei anga, a tuk leh Thawhlehi ah Serchhip District tlawhin hetah hian District chhung dept hrang hrang SPIO te kawmna a neih bakah Village council hruaitute a kawm dawn bawk a ni. Vawiin tlai khan Pu Samariya hi State Guest House Chatlang ah Mizoram State Information Commissioner Pu Mangjangam Touthang leh Information Commission Secretary Pu Dolianbuaia ten anlo dawng sawng a ni.

<><><>

ASF UPDATE

Kumina thla engemawzat chung African Swine Fever (ASF) vawk pulhri leng avanga nitin vawk thi an awm ziah hnu-ah a vawi khatna atan vawiin khan vawk thi report a awm lo.

ASF hrileng avanga nitina vawk thi zat a hniam chhoh zel laiin pun leh hluai chang a awm leh thin a. Vawiin khan vawk thi pakhatmah a awm lo niin animal husbandry & veterinary department hotute chuan an sawi . Heti hian kumin February ni 9-a Champhai district Leithum khua a ASF vawk pulhri leng avanga vawk thi an chhinchhiah tan atangin vawk 14,699 a thi tawh a. Tun dinhmunah khaw 255 vawk pulhri lenna a puan mek a ni.

Vawiin khan ASF natna vei vawk damlo 2 talh a ni a, Serchhip district a Baktawng khua ami ve ve a ni. Kar kalta Pathianni kha tun hnai a ni khata vawk damlo talh awm loh ni hmasa ber a ni a, Zirtawpni kalta khan vawk suat awm loh ni ani bawk a. Heti hian kumin chhunga vawk pulhri darh zel tur venna atana vawk damlo talh tawh zawng zawng chu 23,941 a tling tawh niin Vety department chuan an chhinchhiah a ni.

<><><>

CHILDREN'S DAY

Vawiin hi Mizoram Baptist Kohhran Ni Pawimawh, 'Naupangte Ni' a ni a, BCM hnuai tualchung kohhran hrang hrang-ah Kristian Naupangte Ni hi ursun taka hman a ni.

Kumin Naupangte Ni thupui "Naupangte leh Rawngbawlna" (II Lalte 5: 1-3) hmangin Pathian thuchah ngaihthlak a ni a, naupangte rawngbawlna-a an pawimawhna leh Pathian hmanrua an nih theih dan bakah kohhran-a an dinhmun leh kohhran hmathlir an nih dan te zirtirna pek an ni. Naupangte pawhin he ni puala hian an thiam thil hrang hrangte entirin rawngbawlna an nei bawk.

Kum 2015 a Mizoram Baptist Kohhran Assembly Rorel inkhawm chuan Kohhran pum huapa naupangte ngaih pawimawhna lantirin, Kohhran mipuite inzirtirna hun atan 'Naupangte Ni' hman tha a ti a. Kum 2016 atang khan kumin tin November Pathianni vawi thumna chu 'Naupangte Ni' atan hman a ni ta a ni. He Ni-ah hian Pathianni chawhma Inkhawmah Naupangte pawimawhna leh kaihhraina lam zirtirna te ngaihthlak a ni thin a, Kohhran pum huapa naupangte pawimawhna inzirtirna hun atan tangkai takin an hmang hman thin a ni.

<><><>

MANIPUR TOTAL CURFEW

Manipur-a district 5 - Imphal West, Imphal East, Thoubal, Kakching leh Bishnupur district-ah te, tiamchin awm lovin curfew puan a ni a, thu lengvak leh boruak thalo siam thei thil khuahkhirh anih theih nan district 7-ah nizan atang khan ni 2 chhung atan internet service tih tawp a ni bawk.

Hetih lai hian, Jiribam Dist-a Borobekra Sub-Division atanga rukbo mi 3 ruang, nimin khan police-ten an chhar a, Thawhtanni kalta khan hel nia rin-ten kum tlinglo mi 3 telin mi 6 an rubo a, nimin khan Jiribam Dist-a Barak Circle-ah hmeichhe 1 leh naupang 2 ruang hmuh a ni. State sorkar chuan Jiribam dist-a hel nia rin-te kuta pawisawilo civil mi 3 thihna thleng chu a dem tak zet tih a sawi.

<><><>